

嵩洛訪碑日記

黃易撰

中華書局

叢書集成初編

國山碑考（及其他一種）

中華書局出版發行

秦皇島市資料印刷廠印刷
（北京王府井大街三十六號）

一九八五年北京新一版

開本：七八七乘一〇九二毫米三十二分之一
統一書號：一七〇一八·一五一

嵩洛訪碑日記

此據粵雅堂叢書
本排印初編各叢
書僅有此本

嵩洛訪碑日記

清 錢唐黃易小松撰

嵩洛多古刻。每遣工搨致。未得善本。嘗思親歷其間。剔石捫苔。盡力求之。嘉慶改元之秋。搨搨工二人。自關陽渡河。驅車徑往。輪蹄小住。輒問貞珉。得卽撫摹。篝燈展搨。不減與古賢晤對也。

九月初六日。祥符相國寺。搨元祐經幢。市間得漢鏡。文曰宜君樂。樂未央。大富昌。余苦肝患。醫者云宜散鬱。乃愈。讀此憬然。又購唐鏡一。古幣四。漢印二。

初七日。至鄭州開元寺。殿圯。重葺小構。僅蔽風雨。存兩石佛。一天授二年侯文衍造彌勒像。一開元八年王元度造蒲臺像。殿後尊勝經幢。中和五年僧祖愿書。經篆額。天成二年重脩。幢上層四面鑲佛。邊闌復刻畫像。題字。有天福五年僧敬璋及上柱國楊璋等名。秋陽曝紙。施搨殊艱。寺傍東里書院學徒。見獵心喜。咸來按紙助力。俄頃搨全。惟浮圖北面憲壁對嵌二石。疑亦古刻。高八九丈。莫能致也。

初八日。午抵滎陽。漢開喜長韓仁銘在縣治儀門內。西向露立。頂作垂虹。足半入土。剔至碑座。其下與碑陰兩側俱無字。唐景龍御書賜縣令盧正道勅。陰刻盧公清德頌。額作佛像。旁有行書二行。碑側唐天寶八載盧重華。貞元五年劉士陵。貞元十五年關士約。貞元十八年王皋等題字。宋天禧五年王鑒記。各搨一紙。申刻至汜水縣東關。登高阜。至等慈寺。齊武平五年造像碑在後殿銜壁間。唐高宗紀功之頌。顏思

古等慈寺碑。在寺外高原。紀功頌碑陰之上。有從官臣勣等字數行。高不可揭。惟揭得下層。開元十三年。史敫書。御製途次成皋詩。及崇甯四年王評題名。榮陽以西。崇崗壁立。車行狹道間。僅容一騎。居人穴土爲室。溝深路峻。俯視悚然。

初九日。五鼓。踰虎牢關。高下數里。車陟高危。駭人心目。頂上關帝廟有碑。昏夜莫辨。北趨坦途。望黃河如帶。循芒山而西。過鞏縣。渡洛水。問淨土石窟寺。紆道難達。不及訪碑。行洛岸坡石間。逡偃師境。近城見王輔嗣墓。元吳炳八分碑立道旁。晚抵縣署。王大令秋塋歎然道故。言武君虛谷在魯山脩志。約俟余至必歸。馳書趣之。假余竹輿。命役導引。次早赴嵩山。

初十日。出偃師南門。山田多井。輾輻相望。久安耕鑿。童叟熙熙。言今年麥稻棉花倍收。數十年所未有也。飯府店鋪。望嵩少諸峯。愈近愈翠。登嶢嶢嶺口。入登封境。卽古之轅轅關。峭拔盤曲。數夫絳輿而上。回視鞏洛山川。歷歷可數。及巔達縣城。山岡起伏。悉皆坦途。始知此境已在雲霄之上。經行巖谷間。曲澗奇峯。應接不暇。薄暮至少林寺。登千佛殿。拜達摩血影石。觀紫那羅王藤像。威嚴若生。旁鑄銅鐵二像。不及也。寺當少室之陰。列如屏幃。少頃月上。億施愚山翠屏橫少室。明月正中峯句。至此始信詩境之真。篝燈尋碑。搨得天平二年僧洪寶。武平元年馮暉寶二巨碑。永興等四面造像碑。天保八年僧靜明造像碑。觀音大士像。大安己巳邵公悅疏餘碑。記明再搨。山僧夜起誦經。誦畢習手搏。山中故事。日以爲常。余心弗好。高臥不問也。

十一日過邢家鋪對少室之御碧數峯攢立如蓮花捫少室石闕篆書畫像雖極剝落石質堅剛自然樸古篆銘叢林芝□綿之上列有字前亦有字闕側有字三行叢林之下隔石二列露一伊字東闕題名李客之下有直格隱隱有字皆前人所未見四面多作人物鳥獸褚峻所圖弗確也擬遊會善寺依僧而息登封趙大令使者來迎遂館城中書院

十二日大風不能出遊添募掃工廣募少林諸碑先購得天保八年碑樓寺碑齊武平年宋始興碑

十三日風定乘竹兜出城五里遊嵩陽書院遙見門外唐天寶碑高如坊表雕刻精工徐季海分書整潔余藏本少碑額命工補全碑側明人題刻碑陰中間宋熙寧時張琬宣和間盧漢傑題名二段進書院瞻大將軍柏大七人圍扶疎古茂南面木理潔白余題名一行于上以志欣幸二將軍柏大三人圍亦蒼鬱可觀庭心紫薇一本殊秀雅廊下獲文潞公張昞王郅題名三石東牆得元符二年宋傅小楷書真武經極工柏下舊有石柱宋人題名求之弗獲行三四里至崇福宮殿塑三清像及王天君趙元壇二像極雄偉宋金時所塑也殿階下邱長春海市詩及二元碑壁間□川仙裔題名爐座宋景祐殘刻東行數十步觀啓母闕西闕簷石小損畫像亦多向未盡拓銘詞闕母廟與一行之前有川郡陽一行又二月一行堂銘典請兩銘之首維時二字其言維何下有嘉字皆向所未見其上里許觀啓母石高三丈廣如之絕類吾杭西湖之壽星石正面平削西若廣廈石縫嵌錢蓋村人好事者所爲循山行七八里踰小嶺嶺至中嶽廟樓殿輝煌氣象雄大太室石闕離廟百步砌石整齊畫像亦多上層雖鑿如新二千餘年剝痕猶歷

歷可辨。亦一奇也。廟前兩石人冠冕執笏。比曲阜魯恭王墓前二石人較小。制作皆同。武虛谷疑身間刻字。曾囑余遣工剔土細驗。揭其形以歸。信爲無字矣。茲余親辨。東石人冠頂上一馬字。深刻極古。真漢人八分。兩石人之背。有孔八九。鑄鐵尙存。或當時門闕嵌置之故。進西華門。宋金四巨碑對立。峻極門外東階。見魏寇謙之等碑。已有塌本。惟唐咸通六年脩廟碑并碑側題名未有。大殿前兩鐵獅。金正大年鑄。鐵鏤元至元年銘。大門內守庫鐵人四。內二人有治平熙寧等款四段。

十四日出南門。過懷來山。涉崇岡。望嵩頂。見太室正峯。形勢厚大。其右少室。宛若拱侍。至告成周公廟。觀測景日表。登觀星臺。臺後平鋪石槽。漏水以算日影。東原有斷碑首。曰大唐洛州告成等字。漫漶難讀。稍東。龍華廢寺。斷石幢二。俱刻佛經。半已漫滅。行數里。循平洛澗。至石淙。怪石凌空。面面靈瘦。澗水奔流。深潭澄碧。誠奇觀也。武后遊石淙時。北崖刻詩。南崖刻序。下臨潭水。揭工架木求之。北崖詩刻之上。石穿數孔。昔年架屋之迹也。后管避暑於此。當年構造。自極工妙。今惟山空水深。奇峯滿壑而已。余至此。聽泉捫石。想盧鴻隱居之金碧潭雲錦淙諸勝。定亦如此。惜徑荒難達。諸勝莫可蹤跡矣。石淙題刻不少。余尋見宋人范忠宣數種。他多近人所題。磴壁危滑。不能駐足。遍視爲可惜也。

十五日。出北門十里。積翠峯下。遊會善寺。門外銀杏大可四圍。古柏亦相等。蒼茂可愛。入寺。僅見東廊。唐大曆二年會善寺碑。戒壇勅牒。問他碑。山僧導至西原戒壇舊址。見東魏天平二年嵩陽寺倫統碑。造像精工。兩面俱刻。向獲塌本。止下層八分書一段。餘皆未揭。其上篆額與諸佛名刻字。工人弗顧也。戒壇護

法石像碎臥荒草間。唐開元時道安禪師殘碑半埋土壤。惟淨藏禪師塔銘尚嵌塔身。巍然西峙。元僧數塔在寺東。碑刻封號極崇大也。

十六日再遊中岳廟。古柏廿餘。比曲阜孔廟之柏大而矮。東一柏最大。過於嵩陽書院之二將軍。殿後偃柏二。亦古峭。惜萎其一。揭唐宋元諸碑。鐵人鐵獅鐵爐諸款。再觀太室闕。題名其上。問盧巖寺及嵩頂。徑窄路荒。前年有願者欲往。治途半月始達。余無濟勝之具。遙瞻山翠。嘆息而已。

十七日遊老君洞。大風揚沙。至谷口而返。再遊嵩陽書院。移文潞公張杲王邦題名三石於東偏小室。燭登封趙大令嵌置壁間。明登封令傅君樞作存古書院。收諸寺殘石置此。今改文昌宮。余往捫索得宋金元石刻九。內橫石刻天王神鬼像極工。有吳道子李龍眠筆致。必宋金名手之作。趙閱閑題達摩相諸刻。亦佳。亟搨之。景侍郎冬陽說嵩云。戒壇寺石幢有唐宋人題字。傅君樞初移署中。旋載歸邢臺。故不復存。余思傅君移置諸石。保殘守闕。良費苦心。何嵩境有名石幢。反移歸杜第。理或未然。考畿輔志乘。邢境並無此幢。景說未可盡信。余訪詢登邑揭工。言傳聞幢已斷缺。恐官追問。久已埋藏。寺僧云。數十年前重脩諸寺。舊碑大半移埋。此說爲近也。飯趙君官署。趙名時。號及庵。萊陽進士。清勤爲政。登人愛之。幕中胡君赤霞賢而才。皆乞余書笑而應之。

十八日早將行。揭工攜少林諸碑至。琳琅滿目。捆載而歸。趙令馬尉郭外作別。少室山光清翠可戀。山高風大。登陟良苦。臧獲雖有憂色。望永泰嵩麓法王諸寺。不及留覽。下轅轅至轅嶺。山不高而清曠幽遠。登

仙君廟，憑虛四望，二室諸峯，環繞當面。昔人謂是仙境，良非虛語。塔東武后昇仙太子碑，高大工緻，今猶完整。碑側宋盧功裔題名甚工。塔西宋謝絳脩大殿碑，搨得碑側濟南李格非等題名十一段。碑陰亦有宋人題名，晚不及搨。宿府店鋪。

十九日，至偃師。盧谷已還，飯齋中，縱觀金石搨本，及古玉圭。晉劉韜碣石，贈余搨本數十種，同至學宮明倫堂，觀所收魏齊至宋元諸石刻，是盧谷數十年所致也。補搨數種。秋塋先至洛陽，書來約余同盧谷往洛。

二十日，盧谷攜子愚溪約余赴洛。飯義井鋪，稍北平等寺舊址。齊碑四通並立，半爲土掩。地名四里碑，安邑宋芝山誤聞此是劉寬碑，今乃釋然。煩秋塋遣人剔出搨之。過白馬寺，大門內至順鉅碑，書甚工。宋蘇易簡碑已碎。大殿前魏造像幢，後殿唐麟德年蘇寶才造像，壁間晉開運造像。宋摩騰入漢靈異記，元至正詩刻。後殿元貞鐵鐘一，塔上甯遠將軍造像殘石。余與盧谷喬梓，尋金時方塔前列金碑一，塔間舊多碎碑，今盡失之。望雙碑凹，一是魏王基碑，一是唐狄府君碑。府君梁公父也。盧谷云：昔狄氏後賢訪問祖墓，得洛城道旁一石，題曰唐忠臣狄梁公墓，遂以墓穴在是，封鬢表之。不知雙碑凹爲確也。過二十里鋪，廟中見五代羅周敬碑，道旁神龜二年造像刻石。晚抵洛陽，與秋塋、盧谷翦燭快談。新安鄒大令霞城能文嗜古，亦來訂交。

二十一日，同秋塋及盧谷喬梓出南郭，渡洛河，謁關忠義陵。極崇麗，遊龍門賓陽諸洞，觀諸佛像，莊嚴博

大旁多刻字。齊洛州老人佛碑。唐岑文本三龕記。俱刻洞外石壁。僧言三龕記舊有褚遂良款。石片碎落。昔藏寺中。旋失去。老衲謝草猶見之。飯臨河小閣。望香山如圖畫。飯畢循山而南。石壁鑿洞。不能數計。登老君洞。觀魏齊諸刻。洞上老翁王樵夫居之。自言年九十有三。咸以爲仙。蔣學士獨敬禮之。夕陽已西。不及至香山而返。

二十二日。爲虛谷先人吏部公書神道碑。及魯山令董君書巢案書聯額。書畢。偕虛谷步縣學東。看魏大覺寺碑。惜文已磨盡。刻明人修廟記。止存篆額。欲訪董湘涵友澆草堂。聞其孫析居不果。從其族人購得董氏所藏孔和碑。陳德碑。及太和十二年宕昌公造三級浮圖碑。唐張嘉祐墓誌。盧杞書其父碑十數種。磚塔銘半幅。石鼓文九紙。皆精本也。

二十三日。秋廬虛谷先返。偕余宿龍門鎮。視工人廣掘諸刻。佛洞多在山半。虛谷欲登最高之九間殿。看張九齡書牛氏像龕刻。力憊未果。余竟登之。大虛舍那佛像高八丈五尺。石磴宏敞。唐奉先寺基也。大歷十年造。虛舍那大像碑。內侍省功德碑。牛氏像龕記。魏國公殘碑。宋丁裕題字。俱刻石壁。

二十四日。渡伊河。遊香山寺。及巔眺龍門山。石壁危峭。鑿佛如林。虛舍那大像坐半山中。別有景象。寺無古刻。惟唐白少傅栗主。國朝湯西崖少宰。右曾配食焉。堂懸西崖書石樓風月小額。綠山尋碑。佛屋刻武后時書經。極工。唐人大足等年造像銘。宋王暉詩。真宗龍門銘。歸寓。鄒大令體道蒼頭來索書楹帖。爲秋廬作龍門覽古圖長卷。

二十五日視工人揭龍門諸刻。山僧古涵精摹搨。亦來助力。僧知伊闕洞頂小龕有開元刻字。探升而上。得一紙。乃邱悅贊利涉書。向所未見。非此僧莫能致也。

二十六日欲行雨阻。工人冒雨揭碑。持來紙溼。余爲熨乾。得香山諸刻。及唐人党諱。辛祕等題名。惟少大足一刻。龍門石洞內見頂刻大唐永隆等字。圓轉巨書。老君洞頂之刻幾遍。架木高危。不能攝取。嘆息而已。住龍門六日。揭碑三百餘種。得漢鏡文曰。九子明鏡。世異慕雙。服者卿公。又長宜子孫鏡一位。至三公鏡二。

二十七日雨止成行。行後望龍門諸山。在雲霧間。荒原翠碧。宛若春郊。伊水灘聲。蕩漾塵俗。午過白馬寺。揭諸造像鏡銘。至義井鋪。尋四齋碑。業田者畚鍤出之。不冝受值。索余書而去。晚至偃師署。秋陸齋中。執菊四列。與武虛谷叔姪及嵩縣朱大令持螯小酌。劇談風雅。幕中山陰金臨川爲余寫墨梅。甚淡雅。勝畫二樹多矣。座中人索書小聯。盡應之。

二十八日秋陸又招友賞菊。虛谷見贈岳麓寺碑額碑陰。并唐李吉甫等永興石室題名。超化寺元遺山王黃華等題名。榻本十數種。秋陸惠昇仙太子碑。及靈巖山人詩。吳會英才集等書。

二十九日別秋陸東歸。出城十里。登芒山。望宋會聖宮碑。南見太室少室諸峯。在層雲之上。北眺太行。隔河雄峙。山腰紅黃色。疑秋葉也。上下坡磴。遠於虎牢關。至馬候午飯。相傳是伯夷叔齊扣馬處。渡孟津黃河。宿孟縣城南。

三十日早步學宮忠義祠。魏唐宋元諸石刻嵌置工整。欽州馮戶部魚山主講此地時所收也。揭補篆額數種。晤孟尉張君蒼亭。同訪崔君梅軒。觀所藏范中立脩幅畫香光盤谷圖。梅軒新得唐咸亨年司馬興墓誌。揭惠二本飯菴亭處。賞菊看硯。爲書四硯山房小額。出城至花封書院。見魚山八分書碑。絕類韓勛。嘆吾友詞翰之美。今時何可多得。望太行山色。竹木漸繁。渠流清潔。始知歷代名園多在此山之陽。晚宿懷慶東郭。

十月初一日。至清化鎮。與縣康孝廉少山。好古嗜學。久思過從。至此。問康君住北山。尚隔十里。不及返晤。馳書通問。兼索濟瀆諸碑。夜宿恩村。康君覆書云。諸碑皆有。惟唐玉真公主受戒碑。魚山前訪時已佚。恩村崇恩院有大定二年牒。乘揭搨之。

初二日。至獲嘉。問法雲寺不得。遇空車百輛。魚貫而東。知征楚之兵過新鄉。獲境之車助力也。

初三日。過新鄉。白鶴觀搨宋政和刻劉海蟾仙跡碑。金皇統碑。晚宿衛郡西郭。直隸兵夜抵城外。星馳赴楚。

初四日。至衛輝府治衙神廟。洗剔晉太公呂望表兩斷石。始見碑側有諸□□者。又□□□□。飭表上八分書一行。後周郭進屏盜碑。碑陰兩側俱有字。尋武定八年太公廟碑。已嵌置北門外新廟。悉搨之。飯別駕畢硯山署。觀孫雪居雙柏圖。並香光懷新堂圖。甚工妙。硯山之弟靜山孝廉出觀。明人尺牘。宋仲溫。姚廣孝。于忠肅諸公數十家。皆精美。見題跋。知爲吾友江秋史舊藏。良朋仙去。物亦雲烟。對之惘然。署多奇。

石爲硯山作石供山房扁。知楚氛稍定。身山師破當陽。邀賜世職。江南豐縣決河。計日可塞也。

初五日。過衛郡。命工搗城隍廟元時鐵鐘。得張稚恭山水立幅。程穆情題跋。漳州經幢搗本。宿滑縣老牛店。

初六日。大風。至東明郭外宿。展觀晉刻齊太公斷碑。粘連接縫。

初七日。抵曹郡西郭外。見穹碑。驗是元脩濟瀆廟碑。商琬撰書。攷論濟水源流。歷朝遷徙之故。文極該博。書復清挺。上有明侍郎王永和題跋。命工人搗得一紙。

初八日。出曹郡。遇滕令周君。護兵赴豫。晚住鉅野龍堦集。搗硯祥符所得唐鏡。文曰。仙山並照。智水齊名。花朝豔采。月夜流明。龍盤玉瑞。鸞舞雙情。傳聞仁壽。始驗銷兵。凡八言。銷兵既兆。楚賊卽平。可慶也。初九日。過鉅野縣。在學宮明倫堂。見元統年謝端書朱子語橫石。有瘞崔銘風格。將來搗之。晚宿嘉祥縣。于大令來見。知汝令葉九忽化。才而不祿。可傷也。

初十日。抵濟。計嵩洛搗碑四百餘。得舊搗本四十餘。以副本分贈鐵橋。梅村。鏡古諸君子。大快事也。

右嵩洛訪碑日記一卷。國朝黃易撰。案是書爲亡友黃石溪明經鈔存本。無撰人名氏。相傳爲黃小松筆。云。考翁覃溪復初齋文集。黃秋庵得碑十二圖序。稱其方欲搜討嵩山三闕。上下巖洞祕文。雲木蒼鬱。靈境霽然矣。又當作嵩洛訪碑圖云云。又黃秋庵傳。亦有南游嵩洛語。又小松筮仕濟寧。而是書未有初十日抵濟語。又覃溪所撰傳。稱李鎮橋亦以金石之學世其家。與君最契。而是書有以副本分贈鎮橋等諸君子語。傳又稱鑄諸石者安邑宋葆淳。而是書復有安邑宋芝山誤聞。此是劉寬碑。今乃釋然語。芝山葆淳號也。又小松工書。而是書屢言爲人書碑版聯額。又墨香居畫識。稱其寫山水得北苑巨然正法眼藏。而是書自紀爲秋庵作龍門覽古長卷。又小松錢唐人。而是書有絕類吾杭西湖之壽星石語。又阮文達小滄浪筆談。稱小松嘗作得碑十二圖。及嵩洛泰岱訪碑圖。以秀逸之筆。傳達古之情。得未曾有。則小松果從嵩洛訪碑且作圖矣。定是書爲所撰。似非臆斷。小松名易。字大易。號秋庵。其父樹穀。號松石。故又號小松。官至兗州府運河同知。護運河兵備道。精於金石六書之學。著有小蓬萊閣金石文字。及小蓬萊閣碑目等書。蒲褐山房詩話。稱其官濟寧。凡嘉祥金鄉魚臺間漢碑。悉搜而出之。而武氏祠堂畫像尤多。所見漢石經及范式三公山諸碑。皆雙鉤以行於世。則其生平嗜古。隨處搜羅。而是書則訪碑嵩洛時所記也。孫淵如寰宇訪碑錄自序。稱又值同世通人名士。搜奇好異。郵示所獲。擴其見聞。若令王少寇。錢少詹大昕。阮撫部元等。而小松與焉。又寰宇訪碑錄所載。如在河南洛陽熹平石經。尙書論語殘字。在河南南陽圉令趙君等碑。俱註已佚。則非此行所得。而亦聞浙江錢唐黃氏藏本。其搜討諒非旬月矣。是書卷

佚無多。殆未經刊刻。余恐其不傳也。亟付梓焉。咸豐甲寅上巳後四日。寒食節。南海伍崇曜跋。